



# INFORMACIÓN Á CIDADANÍA

## BANDO MUNICIPAL QUE REGULA AS ACTIVIDADES DAS FESTAS DE SAN XOÁN

Prezadas veciñas e veciños,

Este ano 2020 o San Xoán coruñés non poderá ser como sempre. Aínda que xa non estamos no estado de alarma, a crise sanitaria da COVID-19 persiste e a recuperación da normalidade segue sometida a importantes limitacións, de acordo coas normativas ditadas polas autoridades sanitarias para preservar a saúde pública, evitando os contaxios. É necesario que este ano toda a ciudadanía faga un esforzo suplementario de responsabilidade, de respecto, que se evite o amoreamento de persoas, que se poida manter a distancia social, que se respecten as limitacións de capacidade e que se use a máscara nos casos en que é preceptivo.

Por iso, este ano, debemos insistir máis que nunca na dispersión da celebración, nun San Xoán nos barrios da cidade, pero aínda así sen poder realizarse algúna das actividades que viñan sendo tradicionais.

Así, facendo uso da facultade que me concede o artigo 124, letra g, da Lei 7/1985, do 2 de abril, reguladora das bases do réxime local,

### FAGO SABER:

O 23 de xuño pecharase o acceso ás praias da cidade, que deberán baleirarse de persoas, ás 21:00 horas. Non se poderán facer cacharelas en ningún espazo público da cidade, nin poderá haber música ao vivo, nin se autorizará o peche de vías públicas, todo iso para evitar que se produzan reunións dun número excesivo de persoas.

### SARDIÑADAS, CHURRASCADAS OU SIMILARES

O día 23 de xuño permitirase realizar sardiñadas, churrascadas ou similares en espazos de titularidade pública. Para isto, será preciso que as persoas interesadas presenten unha declaración responsable por escrito ao Concello, manifestando cumprir os requisitos para desenvolver a actividade e identificando a dúas persoas maiores de idade con todos os seus datos de identidade e contacto. A declaración poderá presentarse a través da sede electrónica municipal ou, no seu caso, presencialmente nos rexistros, previa cita, sempre con, canto menos, 24 horas de antelación.

O apartado de Seguridade Cidadá da web do Concello contén consellos e recomendacións relativos á seguridade desta actividade. Ademais, será obligatorio limpar onde se instalen as grellas e resto dos elementos utilizados para desenvolveren a actividade.

Os servizos de seguridade e urxencias municipais (Policía Local, Servizo de Extinción de Incendios e Urxencias e o Servizo de Protección Civil) velarán polo cumplimento do regulado nesta disposición e no resto das ordenanzas municipais, así como nas normas ditadas polas autoridades para regular as actividades no período de nova normalidade e crise sanitaria ocasionada pola COVID-19 de xeito que se as persoas responsables de instalacións non as retiren ou non as modifiquen voluntariamente no caso de seren requiridos para iso por razón de seguridade, poidan acceder á súa retirada inmediata e traslado onde se considere necesario, sen prexuízo da iniciación, no seu caso, do expediente sancionador que puidera corresponder. As zonas ocupadas por grellas e outros elementos deben garantir o libre paso de vehículos de emerxencia.

Non se permitirá realizar churrascadas nin sardiñadas en zonas forestais ou baixo o arboredo de parques e xardíns. As grellas e barbacoas deben manter unha distancia mínima de 10 metros de distancia ao tronco das árbores.

Non se permitirá facer churrascadas ou instalar grellas en: a totalidade do trazado do oleoduto, o Parque de Bens e o Monte de San Pedro, os Xardíns de Méndez Núñez, os Xardíns de San Carlos, a praza das Bárbaras e a contorna da Torre de Hércules, incluído o merendeiro das Lapas, sen prexuízo de que os servizos de Seguridade poidan designar algúna outra zona baseándose en criterios de protección das persoas e os bens públicos.

As infraccións das normativas locais, autonómicas ou estatais aplicables serán denunciadas, tramitadas e sancionadas de conformidade coa normativa que as regula en cada caso.

Nos supostos recollidos na lexislación vixente e sempre que existan razóns de seguridade que o aconsellen, o Corpo de Policía Local poderá, como medida cautelear, poderá comisar ou retirar todo tipo de materiais, instalación ou bens móbiles en xeral, logo de llelo requirir ás persoas interesadas cando iso for posible. Se o comisado fose perecediño, destruirase ou entregárselles a centros benéficos.

A Área de Seguridade Cidadá queda autorizada para ditar as instrucións complementarias que esixan as circunstancias e o desenvolvemento das actividades.

Faise un chamamento a toda a ciudadanía para celebrar o San Xoán atendendo ao cumprimento de todas as normas e á responsabilidade na obriga de coidado que a situación e a normativa especial ditada para ela esixe, en particular en todo o relativo a evitar o contaxio e a extensión da COVID-19.

O presente bando estará en vigor desde o día da súa publicación no taboleiro de edictos e na sede electrónica do Concello ata a conclusión das actividades que nel se regulan.

A Alcaldesa

Inés Rey García

Teléfono

010

coruna.gal